

2020 Schnitzelpunk

As hät an Tesla-Plöffer fascht d Nana überfahra.
Jetzt hät er vom Rolator an Kratz an sinem Karra.
Är kann doch nüt drfür und närvt sich drum wia gstört,
är hät doch gopfertelli dä Rolator gar nid ghört!

Fürd Wölf, jetz müander loosa, gits jetzt Fuater us dr Doosa,
will d Gaissa könds nüm frässa, dia händ Tuberkuloosa.
Ds Problem wär perfekt glöst und könnt ma glatt vergässa,
wenn dia Wölf Politiker statt Gaissa würdend frässa.

OK, iar hänn scho rächt, ja usgseh tuat si guat,
wenn si uf dr Bühni doba ummahampla tuat.
Aber dänn zum Losa, isch a Betonmischer
öppa numma halb so schlimm wia d Helene Fischer!

Au wenn ärs gar nid schafft, wenn är schwimmt, dänn schafft är,
dr Bromeis üssa selbschternannti Wasserbotschafter.
As wäri doch viel besser für sini Wasserbotschaft,
wenn är statt blöd go ummaschwimma, aifach mitma Boot schafft.

Dr Ex-Papst Benedikt sait zum Jetzt-Papst Franz:
"Wenn du ds Zölibat abschaffsch, dänn biisst sich d Katz in Schwanz.
Stell diar vor, als Konsequenz könntis dänn jo groota,
dass uf ds Mol a Pfarrer au a Pfarrer wett hüroota."

D Lolita, d Petra und d Sabine händ, jetzt müander loosa,
ussafinda wella, wär am beschta könni bloosa.
D Förschter händ als erschti gstöhnet und dänn gschraua: "Ach,
jetzt leggend üs dia Sturmtüüfslampa d Wälder wieder flach."

Uiiii-ii-ii-amamamee
Är hät nia gnuag und klini Brötli bacha isch drum nid sis Ding.
Macht liaber aina uf Jambo Bwana und uf Churer King.
Är will no me, är will no me...
Ir Lodge z Namibia kunnt a Gauner und klaut ihm d Plöffer-Uhr.
Drum wird er hässig, ganz schön hässig, drum kunnter zugg uf Chur.
Är will no me, är will no me...
Miar findends schad, jo so jammerschad, Domenig bis nid stur.
Gang doch zugg uf Afrika, miar schänkend diar a Uhr.
Är will no me, är will no me...

Z Chur gits sona Bruuch, dä isch no rächt archaisch,
do dörfma no luut säga, was a rächta Maa isch.
Döt zeigend strammi Churer viel Bai bi Wurscht und Wii
und dörfend uf dr Bühni für an Obig Tunta sii.

Zum Glück könnd miar für Cryptoleaks und söttig Turbulenza
a PUK isetza, dia sorgt dänn für scharfi Konsequenza.
Zum Bispiel au bim Baukartell isch das denn gar nit ohni,
wägam Fall Quadroni kriagt dr Schlegel jetzt kei Boni.

Muäsch, wennt wettsch a Piar go suufa, zersch no Gäld go hola,
machscht das gschider nitta mittra Käpsalipischtola

Dr Pfischer vo dr CVP häts jetzt ufs C abgeh.
Partei vor Mitti ohni C isch doch a top Idee.
D Mitti isch so gross und wemma dötta stoht,
kamma sich ganz aifach dräiha, wia dr Wind grad goht.

Mega heisst u huara und Mü heisst Muggaseckel.
Miar redend scho a bitzli ruch z Graubünda, gopferteckel.
Trotzdäm sind miar sensibel und au zivilisiart.
Drum schellts üs, wänn a Zürischnorra üs z Bern röpräsiartiart.

Dr Not Vital, dä hät impfall a Knall.
Verdiant drmit a huufa Gäld, as isch fenomenal.
Hät gära schöni Büabli, zTarasp in sinem Schloss,
hürotet dänn bi Wii und Rüabli trotzdäm nur sis Ross.

Iar liaba Tiarlischützer und Drohnepilota,
Viarhundertfufzig Rehli grettet, isch a schöni Quota!
Doch ghaua oder gschocha mit Kugla oder Schrot,
spötischstens bir Sonderjagd sind dia Bambis tot.

Parteia sind im Stress, will sit neuschtem müan si,
wäg däm koga Klimawandel uf zmol alli grün sii.
Nur d SVP bliibt standhaft, do kamma nuno stuuna,
setzt immer no uf d Schwizer Farba mitma Stich ins Bruuna.

Lauft dr Cologna lang und fahrt dr Schurter Baik mi Schwung.
Isch das impfall, ma glaubts fascht nit, Landesverteidigung!
Näbscht Priisgäld kriagsch no Sold, hey Schurter waisch wia sparsch!
Do losch na gschider in da Hosa, dina wiissa Arsch.

Dä Öpfel wird vor SVP spiegelglatt poliart
und dänn zu ihrem Schreck vonra Wurmplog infiziart.
Und wenn dia Würm dänn satt sind, das findamiar doch ds Gröschti,
gits us da Öpfelräscha a faini Öpfel-Röschi.

Söllmann oder söllmanit, sich störa ab dem Shit,
wo dä gwüssi Tagblatt-Schurni öppa vo sich git?
"As isch doch nid so schlimm", maint dr Pesche Lebrument,
"das mags doch liida näb däm Stuss, wonii susch ussaloh."

Dr Credit Suisse Skandal, so strub und primitiv,
hät am Schluss no ds Läba koschtet vomna Dedektiv.
Dr Thiam sait, är heg nüt gwüsst und bhauptet, darum seger,
miar trauens üs fascht nid zum säga – immer no integer.

Häsch wieder d Krüzfahrt buachet, flügsch zum Lädala um d Wält,
häsch vor am Huus a gstörta Karra für a huufa Gäld,
dänn isches würklich läschtig und ächt an huara Kack,
dass d Greta aifach rächt hät, goht aim dänn uf da Sack.

Dr Stadttrot spricht für Grossevents a huufa hunderttuusig.
Chur dia gailschti Partystadt, jetzt wirs dänn langsam gruusig.
Do a Feeta, döt a Fiir, das wär jo gwüss no glatt.
D Frog isch aifach, findend dänn dia Fäschter würklich statt?

Mäganächta Haldasteiner biisst sich jetzt inds Füttla.
Goht id Feria, statt go stimma, nu jetzt gits nüt meh z rüttla.
As git an kliina Trooscht, sinder z nögschta Mol nid umma:
Als Churer händers komfortabel, do wird briafllich gstumma.

Händ iar au langsam gnuag und mögend jetzt dia Göra
mit ihrer groossa Röhra langsam nümma ghöra?
Do könder lang druf warta, dia hebt doch nia dr Rand,
drum wenn iar ds nögscht Mol wählend, wählend doch dr Brand.

Plagiara kunnt vo Plagiat, genau so wia Plagööri.
Alti Witz fräch zämmastähla, kann dr gröscht Galööri.
Wirsch vor Jury no belohnt, wennd zünftig gosch go schniffa,
Hey, miar kömend au ohni us, dia Kappa kasch nid kiffa.